



DEO OPTIMO MAX.
UNI ET TRINO,

VIRGINI DEIPARÆ, ET S. LUCÆ,
Orthodoxorum Medicorum Patrono.

QUÆSTIO MEDICO-CHIRURGICA.

*QUOD LIBETARIIS DISPUTATIONIBUS
manè discutienda, in Scholis Medicorum, die Jovis vigesima-quintâ
mensis Junii, anno Domini M. DCC. XLIV.*

PRÆSIDE

M. JACOBO-BENIGNO WINSLOW, Doctore Medico,
Regiæ Scientiarum Academiæ Socio, Anatomes & Chi-
rurgiæ in Horto Regio Professore, Linguarum Danicæ,
Suecicæ, Germanicæ, & Belgicæ Interprete Regio, &c.

*An ad servandam præfatæ matrem, Obstetricium hamatile minus anceps & æquè infans?
quàm ad servandum cum matre factum Sectio Cæsarea?*

I.



ARIENDI difficultas communis omnibus, dispar in singulis;
levior his, illis gravior, extrema nonnullis, quibusdam inelucta-
bilis, imò nec solâ manu, nec ullo unquam medicamine superanda.
Postrema hæc parturienti fœtûque intensa, modò utrique, alteri
subinde magis, minùs alteri, exitialis. Causæ multiplices; aliæ par-
turienti molestæ, fœtû aliæ; in fœtu moles universi corporis;
ejusdem vel capitis abdominisve Hydrops, partium majorum numerus insolitus, &c.
In parturiente, Ossium Innominatorum conformatio prava, Symphysium Osseï pel-

A

vis durities, coccygis incurvatæ renixus, orificium uteri strictius; partium vicinarum tumores, &c. Verbo, qualiacunque pariendi ac nascendi impedimenta sive obstacula; quibus annumerare licet mortuum in parturiente vivâ fetum, mortuam fetu nondum extincto matrem, Incassum huc referri memoratas symphyfes fortè suspicaris, easdem in partu laxari negantium opinioni favens? Chirurgus Urbis peritiores consule; expertas obstetrices interroga; testes oculatos examina. Non ita pridem in scholis Medicorum Parisiensium, Clariss. D. BOUYARD exquisitissimâ Thesi publicâ, & simul è suggestu monstratâ fœminæ ex partu demortuæ ossâ pelvi recentissimâ, id satis superque comprobâsse memento. Anteriora Scholæ nostræ Doctorum monumenta itidem scrutare. At omnium instar tibi sit priscum fidumque ejusdem Scholæ oraculum, experientissimus RIOLANUS: „Fa-
 „teor quidem, inquit, in viris cartilagineam copulam ossium pubis duram esse,
 „quæ tamen si culter per copulam exactè ducatur, nullo negotio separatur. At in
 „mulieribus mollior est, & in gravidis ante partum unctuofo humore imbuta,
 „crassior apparet, Citatis deinde JAC. SYLVIO, FERNELIO, SPIGELIO,
 „&c. idem testantibus; „sed quid opus est, pergit, testibus in re tam manifestâ,
 „Sola experientia fidem faciet. Sæpius atque PLUSQUAM TRIGESIES in mu-
 „lieribus à partu extinctis, vel paulò ante enixum, VIDI præsentibus Medicis
 „& Chirurgis, cartilagineam quæ ossa pubis colligat, minimi digiti latitudine di-
 „ductam, ita ut hiuleca pubis ossa apparent, si digito *intus* attrectarentur. Quod
 „etiam ante dissectionem cadaveris innotescerebat, uno crure sublato; sic enim ossa
 „pubis mobilia deprehendes, unumque alteri super-eeminere. Atque anno 1632
 „mense Januario, cùm publicam Anatomen administrarem mulieris, quarto die à
 „partu suspensio strangulatæ, præsentibus ac spectantibus trecentis auditoribus, in
 „scholis Medicorum demonstravi, commissuræ ossium pubis interjectam cartila-
 „ginem digiti latitudine laxatam; quin etiam *ossis sacri cum ossibus ilium commissu-
 „ras mobiles* admodum scalpello tenuissimo facile separavi. (*Anthrop. l. 6. c. 12.*
 „*ed. 1649.*) „Hæcque symphysis (*inquit in Comment. de Ossibus*) in viris atque
 „mulieribus non adeo est stricta atque volunt Recentiores, ut dirimi nequeat, nisi
 „vi adactor scalpello; nam qui commissuram exactè deprehendere potest, scalpello
 „acutissimo, cujus dorsum æquale sit aciei, facillimè separabit, tam in viris quàm
 „in mulieribus. Verùm, ut unde recessum, revertamur, in desperatissimo ac de-
 „plorando parturientium statu, ubi nec solæ manus, nec qualiacunque pharmaca
 „solari possunt, ecquid auxilii? Binæ duntaxat in universum, tanquam anchoræ sa-
 „cræ, hæcenus innotuere encheireses, Obstetricium armatum seu hamatile, & Cæ-
 „sarea sectio.

I I.

ENCHEIRESEON memoratarum prior, EMBRYULCIA à compluri-
 bus appellari solita, respectu habito ad vocabula Gallica, *Crochet*, *Accouche-
 ment par Crochet*, Obstetricii hamatilis sive armati potius titulum mereret. Orga-
 num hujus præcipuum Uncus est, hamo majori æmulus, instrumentis aliis, partium
 auxiliariis, succedaneis partim, subinde stipatus. Variam unci formam varii exco-
 gitarunt. Antiquissima simplici unco persimilis. Rostrum unci diversè fabricarunt
 periti sequiores; magis minusve inflexum alii; alii versus cuspidem latius; non-
 nulli ibidem foraminulo pertusum; quidam rimâ patentiori fissum. Collum unci
 longius breviori præstare iterata postmodum experientia docuit. Primarii hujus
 organi instrumenta auxiliaria, cultelli varii, tum recti, tum diversè falcati, imò
 annuli perexignâ cuspidè falcatâ artificiosè muniti, aliaque ejusmodi ferramenta.
 Succedanea varia varii protulerunt, varièque prætulerunt; v. g. tractorium orbi-

culare MAURICEAU; marsupium reticulare AMAND; cochlearia gemella PALFYN, forcipes fenestratos MESNARD, uncos odontoides PEU, &c. Altera desperato partui dicata encheiresis, titulo Sectionis Cæsareæ insignita, simpliciori vocabulo GASTROTOMIA nuncupari posset. Transeat longa nominis disquisitione historica. Silentio tamen fortè non esset prætereundum, scriptorem Germanum SCHMIDT illud futuri, cui Cæsar nomen erat, & qui primus in uxore sua morti proximâ extremum hoc auxilium felici eventu arripuit, attribuire. Instrumenta huic inservientia quàm maximè simplicia, nec alia ferè quàm quæ vulneribus integumentorum abdominis communiter adhiberi solent, v. g. novacula, scalpelli, specilla; acûs, fila, linteamina, fasciæ, &c. Nullæ hîc inventiones novæ. En! primum Encheireseon istarum discrimen. Secundum ostender usus earundem expositio, ut, si alteram sætui vivo ferè semper, nec rarò parturienti vivæ nocuisse, alterâ verò & fœtum & matrem unâ superstitis ut plurimum evasisse constiterit, istam non minùs anceps nec æquè insons in tali casu remedium esse, quàm hancce, legitimâ conclusione censi possit.

III.

USUS Obstetricii hamatilis, seu EMBRYULCIÆ, primævus erat fœtum mortuum, ministerio solatium manu nullatenus cedentem, unco hanc vel illam capitis partem &c. penetrante extra sinum vivæ matris eliminare. Aliquo deinceps tempore hos intra limites usus ille constitit, minoribus præcipuè fœtibus extrahendis apprime sufficiens. Cæterum hocce nec majores fœtus educi, nec varia etiam minorum obstacula tolli posse experti, aliis instrumentis viam unco paraverunt, amputando partes molendi augentes, findendo cranium, ut evacuato cerebro vel sero minueretur caput, perundendo ventrem hydropicum, ut effluerent aquæ. Remotis ita impedimentis ejusmodi, moles reliqua unco, ferè veluti hamo piscis, excutiebatur facillimè. Invaluit postea in tali casu uncorum usus, variè tamen, uti dictum, ad varias utilitates apratorum: felici quandoque successu à verè peritis, fœminei corporis structuræ gnaris, in obstetricio frequentissimè versatis, probitate ac prudentiâ claris adhibitus. Quot etenim parturientes miseras triculento obstetricio hamatili mactaverunt imprudentes atque impudentes sciolî, qui fœtum mortuum aut vix semianimem discerpendo vivam matrem funestè vulnerarunt; uterum lacerando, fodicando vesicam, intestinum rectum lacerando; aliasque vicinas partes cæcis & errabundis tentaminibus inhumaniter lacerando? Quot nondum extinctos necavère fœtus, eosque proinde, quod imprimis horrendum, sacro, sine quo nullus ad vitam æternam aditus, baptismali lavacro orbârunt? Aurea hac de re monita Clarissimi D. HEISTERI, ex locupletissimo ac doctissimo ejusdem Tractatu Chirurgico propriis transcribi verbis merentur: » *Oportet autem* » (inquit, p. m. 1061.) *hic ante omnia, & quàm fieri potest diligentissimè, verè-nè* » *jam mortuus, an vivus adhuc infans sit, explorare, ne vivum adhuc infantem te-* » *merè ac præmatuè in partu difficili ferramentis aggrediamur, eumque sic vel* » *interficiamus, vel saltem graviter lædamus ac laceremus. Atque id ipsum magis* » *etiam ideo, quia maximam partem incerta sunt atque fallacia, quæ proponi commu-* » *niter solent, de judicationis hujus in utero judicia; præsertim si vel in axillam, vel* » *in clunes, vel in dorsum, vel & in alterutrum capitis lateris conversus esse infans* » *deprehenditur; siquidem his in partibus vel nulla omnino, vel saltem per-obs-* » *cura & incerta vitæ fœtus in utero signa sese ostendunt; ita ut faciliè mortuum* » *existimemus, qui tamen adhuc vivit, licèt sæpe valde jam à partu diuturniori sit*

4

» debilis . . . Ut ne quid (p. 1062.) enim hic dissimulem, fateri omnino cogor,
 » memet ipsum olim, hoc atque aliis signis aliquando inductum, infantem aliquem
 » pro emortuo habuisse, ac proinde velut emortuum eduxisse; quem tamen vivum
 » postea adhuc extirpasse cognoscebam similiter (pergit, p. 1069.) Chirugi
 » etiam atque etiam hortandi sunt, *ne instrumenta prius admoveant, quam de fœtus*
 » *in utero hærescentis morte fuerint certissimi.* Vix enim absolvi ab imprudentiæ, ne-
 » gligentæ, imo crudelitatis vitio Chirugi illi possunt, qui fœtum adhuc vivum
 » atque discerptum vel dilaceratum ex utero protrahunt ». Eâdem ingenuitate pe-
 » ritissimus olim in hac arte D. PEU fatetur se quamplurimis unâ concurrentibus se-
 » mel delusum fuisse signis demortui ac putrescentis fœtus, quem tamen postea vi-
 » vum reperit. Itaque cum non rarò fœtus extincti signa, quæ credita erant certissi-
 » ma, etiam sagacissimos & experientissimos quandoque fefellerint, itidem non rarò
 » necat infantes fœtus obstetricium hamatile: cumque compertum sit, idem non ra-
 » rò evenire posse, imò eodem variè, quamvis inopinanter, lædi posse matrem; satis
 » patet nec rarò anceps, nec semper infons id esse remedium. Veruntamen de aliis
 » Obstetricii armati instrumentis ad viventes educendos fœtus excogitatis mitius ju-
 » dicium. Scrupulum nihilominus injicere posset ingenui, probi, periti, ac mox lau-
 » dati Chirugi uncus odontoides, propterea quòd, licet in eum præcipuè finem,
 » ne sacro Fonte privarentur miselli fœtus, se illud excogitasse, seque illos, quamvis
 » interdum laboriosissimè, vivos ut plurimum eduxisse fœtus, ad Ædem sacram
 » deinceps feliciter deportatos, abundè testetur; attamen eorum quosdam ex inflicto
 » vulnuscule, ut ut inde curato, post aliquot dies imò septimanam integram obiisse
 » fatetur. Ceterum si hic operandi modus culparetur, hunc etiam se delerere decla-
 » rat Vir erga religionem & utilitatem publicam egregiè animatus. Commo-
 » diora eundem in finem ferramenta bina, cochlearibus oblongis minùsque latis
 » haud absimilia, Chirugibus Gandavensis PALFYN, paulò ante suprema publicavit.
 » Illa sine successu adhibita Clarissimus D. HEISTERUS emendare studuit, sed, ut
 » ipsemet fatetur, non succedente negotio. Felicissimo interea successu eadem inge-
 » niosè transformavit peritissimus & in hoc opere exercitatus Chirurgus GRE-
 » GOIRE; qui duodecim annorum, & quod excurrit spatio, ultra septuaginta fœtus
 » onco ferè proximos, illorum ita aptatorum ope liberavit ac vivos in lucem protraxit.
 » Quæ imitatione qualicumque in Tractatu Chirurgico MESNARD delineata viden-
 » tur, neque artificium, nec facilitatem, imò nec simplicitatem variis usibus accom-
 » modatissimam instrumenti Gregoriani referunt.

I V.

SECTIONIS Cæsareæ sive GASTROTOMIÆ primævo tentamini insanti
 » dedisse fertur vivum è defunctâ matre fœtum eruendi, vivumque fervandi spes
 » avidissima temerè non minùs quàm audacter concepta. Optato temerarii ausû
 » eventu edocti, postea sapientiores sectionem illam in simili casu, speque non mi-
 » nori, majori verò prudentiâ, à peritiõibus administrari posse, imò debere, cen-
 » suerunt. Quot ab inferis per eam deinceps ereptos esse infantes, non siccæ, sed
 » veræ testantur relationes? Eâ verò rariùs ab hinc administratæ, vel demùm ferè
 » neglectæ, quot vivorum fœtuum unâ cum matre mortuâ funerationes, quotque
 » proinde, quod magis lugendum, Fontis salutiferi privationes aeternum funestæ.
 » Huc cedro dignissima RIOLANI MAGNI dictata referre expedit: » Est enim, in-
 » quir, Anthrop. l. 6, c. 8.) res magni momenti ad humani generis conservationem,

» scire, an cor in foetu propriâ vitali facultate præditum moveatur? Quæ ad
 » Medicum, Jurisperitum, & Theologum pertinere videtur. Nam si cor in foetu
 » vitali facultate præditum moveatur, per aliquod tempus potest vivere, quo tem-
 » poris spatio extinctæ matri foetus adhuc vivens, secto utero eripi potest salvus
 » & incolumis.... Est enim inhumanum, post obitum matris, foetui pereunti &
 » suffocari parato, auxiliares manus denegare, & sæpe viventem adhuc cum
 » matre mortuâ eodem tumultu contegere & obruere. Idcirco *Juriconsulti* eum
 » necis reum damnant, qui gravidam sepelierit, non prius extracto foetu, quod
 » spem animantis cum gravidâ peremisse videatur. Interest quoque *Theologo*
 » scire, an cor in foetu moveatur, ut extinctæ matri superstes Baptismi particeps
 » fiat, & ad cælos rediens, in beatorum sedibus Dei conspectu fruatur; quia
 » nunc Parisiis consuevimus in moribundis, atque etiam mortuis gravidis, si digito....
 » caput infantis.... deprehendatur, aquâ benedictâ aspergere, vel digito in-
 » tincto rigare, prolatis verbis Baptismi.... Deinde si contingat mulierem nono
 » mense gravidam morbi violentiâ perire, vel in ipso pariendi conatu convulsio-
 » nibus enecari; si parentes, amici, conjux prolem desiderent, consuevimus sta-
 » tim atque extincta est mater, ex Medicorum & Chirurgorum adstantium certo
 » judicio & accurato examine,.... matris mortuæ ventrem aperire, ut foetus ex-
 » trahatur. Sicque VIDIMUS plures salvos & incolumes e ductos fuisse.... Hæcque
 » pia & salutaria foetui, nequaquam mortuæ crudelis, operatio, fieri deberet in
 » quâlibet prægnante mortuâ, juxta edictum *Juriconsulti*..... Maximi profectò
 » momenti videntur ulteriora Magni RIOLANI dictata, ut ebrumdem præcipuâ
 » hic etiam non possim non allegare. » Ad claudendum hoc caput adjungam, in-
 » quit, memorabilem quæstionem Medicis Parisiensibus propositam Bruxellis 1633.
 » & illorum judicium: Supponitur mulier gravida septimestris, quæ convulsio-
 » nibus epilepticis die Jovis circa nonam vespertinam suffocata fuit. Die Veneris
 » spuma ex ore matris prodit,.... tumque venter asidentibus observatus attolli
 » atque deprimi. Die Sabbati circa decimam matutinam profluvium sanguinis coe-
 » git adstantibus denudare corpus, & intrâ femora matris provolutus infans de-
 » prehensus adhuc calidus..... De quæstione ita censemus..... spatium illud
 » moræ & mansionis in utero triginta sex horarum ab interitu matris, quibus-
 » dam suspectum esse potest.... Itaque in ipsis convulsionibus incepit parturire
 » mater,...., sed in ipso conatu parturiendi extinctam fuisse matrem, & post
 » aliquot horas foetum suoapte impetu, ruptis membranis, quibus inclusus erat,
 » vivum adhuc erupisse censemus. Sanguinis verò istud profluvium quod die Sab-
 » bati observatum fuit ab utero matris mortuæ sanguine pleno manasse, ut in
 » quibusdam cadaveribus tertio vel quarto die ab interitu, sanguis ex ore, vel
 » naribus, magnâ copiâ profluxisse visus est..... Verisimile est mulierem post
 » illas convulsiones epilepticas & hystericas spiratione, sensu, motuque orbatam,
 » habitam & derelictam fuisse pro mortua, ut in mulieribus & Epilepticis sæpi-
 » sime accidit, quæ ad funus elata revixere.... attamen sub finem die Vene-
 » ris, & matrem & foetum, mulieris corpus adhuc calens.... & abdominis sub-
 » sultus ac elevatio manifestè indicant & attestantur..... ac proinde potuit se-
 » tus septimestris die Sabbati suoapte impetu.... vivus emergere, prius tamen
 » mortuâ & extinctâ matre, Consultum Bruxellis die 2. Julii 1633, & signifi-
 » runt Medici Parisienses, AND. DUCHEMIN, NIC. PIETRE, JOAN. RIOLANUS,
 » ABEL BRUNIER. » His Magni RIOLANI dictatis veluti suffragium eximii pon-
 » deris addere jubet ipsa necessitas publica nunquam satis prædicandas laudatiss.

simi HEISTERI admonitiones. » Merito (inquit, *Instit. Chirurg.* p. 759.) inter Chir-
 » tianos & quoscumque sanæ rationis homines, à Principibus & quovis Magis-
 » tratu legibus severis esse faciendum, ut omnes gravidæ defunctæ non solum
 » ante sepulturam, ut Leges jubent, . . . incidantur, sed potius post mortem, &
 » quidem quamprimum id fieri potest, à peritis Medicis & Chirurgis scalpello ape-
 » riantur, & fœtus ex utero ipsarum eximantur, ne cunctando in utero quoque
 » moriantur, aut sectionem prorsus omitendo cum matre vivi (quod quàm ma-
 » ximè detestandum ac horrendum est) sepeliantur, vel quod quidem esset ac ip-
 » sos secundùm notissimum illud dictum, (*quem non servasti dum potuisti, illum oc-
 » cidisti*) interficere . . . » Jam ex illo, qui in gratiam utilitatis publicæ neces-
 » sarius erat, digressu ad institutam probationem revertamur. Sectionem Cæsaream
 » sive Gastrotomiam non nisi in defunctis gravidis jamdiu administratam, æquè in
 » viventibus, omni omnino spe per vias solitas partum vivum edendi spe privatis, ten-
 » tari posse salutariter, tam ad matrem quàm ad fœtum habito respectu, sagaces
 » quidam deinceps putaverunt, sagaciores alii reipsa tentaverunt feliciter, Suffice-
 » rent solæ ROSSETI narrationes, quas nuperrimè disputatione publicâ Clarissimus
 » D. BESSE nervosè vindicavit. Nec vindicationem illam minuet Clarissimi D.
 » BIANCHI Professoris Turinensis distinctio inter Sectionem ejusmodi externam &
 » internam, nec quam indè suspicionem profer, sectionibus enarratis nonnisi in-
 » tegumenta fuisse discissa, fœtusque illos vel extra uteri cavitatem formatos fuisse,
 » vel rupto prius utero in cavitatem abdominis illapsos. Id in quibusdam, ut fortè
 » alibi, contigisse non negarem, sed in quintâ ROSSETI historiâ sectionem ipsius
 » uteri nativæ omnium ibi circumstantiarum expositio evidentissimè testatur. Luber
 » in defensionem ac laudem ROSSETI, præcipuos historiæ articulos ipsis ferè ejusdem
 » verbis referre; Bini» eò vocati Chirurgi brachium jamdudum mortui fœtus præse-
 » cuerant, sed ejus corpus intra matricem duplicatum, transversimque situm nullâ
 » manû ductione regere, nullis forcipibus frustillatim ad liberius id expedien-
 » dum minuere, nullis *unculis* prehendere, nedum extrahere potuerunt, id diu
 » multumque conati. Secto igitur recto ductu, sed subobliquè, abdomine, neque
 » id valde magno (ut ipsa puerpera ait,) doloris sensu, deinde utero, Chi-
 » rurgorum alter putrem, & ex caruleo ac subvirescente jam nigrescentem
 » graveolentissimumque fœtum tandem exemit . . . ex locis sectis pauculo sanguine
 » exstillante, Secta ex quinque septimanis decubuit . . . indè gravis iterum facili fe-
 » milique partu eum fœtum deposuit, rursusque ex illo quater facta est prægnans,
 » nihilo plus doloris aut periculi quàm prius experta. Aliarum postea factæ à peritis
 » Chirurgis sectionis uteri historiarum veritatem luculentissimè confirmat & coronidis
 » instar illustrat nuperrimum Encheireseos hujus experimentum singulare, felicissimo
 » cum successu editum à decem peritissimis Chirurgis Parisiensibus, BOURGEOIS, PUZOS,
 » SOUCHAY, SOUMAIN, SEITRE, YERDIER, GÉRAIS, GREGOIRE, IARD, CHAUVIN,
 » LAFITTE, unanimi opere manus auxiliatrices sibi invicem porrigentibus. Vulnus re-
 » cens ipsemet VIDI & attentè examinavi, inexpectatam miratus hilaritatem puer-
 » peræ, quasi ludentis; quæ etiam primo post sectionem apparatus fasciarum ipsa-
 » met aciculas fortè desideratas obtulerat, doloris non valde, ut ipsa fætebatur,
 » intensi oblita. Imò in anteriori partu abortivo, ut & in præcedentibus pariendi
 » conatibus dolores multò majores se expertam fuisse testata est. Hæc differentiæ
 » dolorum istarum relatio particularis veritatem ejusdem phænomeni, à ROSSETO,
 » aliisque, & à Chirurgo Rotomagensi RULEAU, observati manifestè probat. Phæ-
 » nomeni rationem quæris? Partui proximorum, uti & hydropicorum, ventre ultra

dimensionem solitam ac naturalem ampliato, fibræ musculorum abdominis, præfertim ab imo regionis epigastricæ ad pubem & inguina, valdè protenduntur, attenuantur & ab invicem distrahuntur. Recti duorum vel trium pollicum intervallo ab invicem distantes, adeoque non lineâ albâ sed veluti fasciâ albicante distincti, latitudinem & longitudinem duplò majores acquirunt, secedentibus nimirum à se invicem & tensis eorum pariter ac latorum utrinque musculorum fibris, tam carnis quàm tendineis. Vicina hisce Peritonæum, vasa sanguinea, nervorumque stamina simul eodem modo protenduntur & gracilescent. Ita in omnibus istis partibus & minor sanguinis alluvies & minus sentiendi acumen. Utero distento idem ferè contingit, minùs tamen in illâ, quæ placentam sustinet, & infimâ quàm reliquâ ejusdem parte. Perperensis hisce, non adeò miraberis, ex sectione Cæsareâ minus doloris ac minus cruoris alios observâsse: præcipuè si memineris, omnes hæc partes, sublatis obstaculis istis, concidere, corrugari, sicque affluentis iterum sanguinis impetum aliquantisper sufflaminari. Methodorum Enchereleos optimam elegerunt suprâ laudati Chirurgi Parisenses; in peculiari tractatulo, quem in gratiam juniorum unus ex illis emiserat, plenius, quàm in Commentario majori expositam. Hæc mater optimè convaluit, corpore licèt minuscule, tenerimo, & ferendis laboribus impari pluriès in antecessum judicato. Hæc fœtus ejusdem matris integerrimè vivens valensque produit, & Baptismali fonte regeneratus, ad decem usque dies firmâ satis valetudine protraxit vitam, quæ nutricis vel defectu vel negligentia defuisse fertur. Nimis longum foret aliis insuper exemplis testificari, *Sectionem Cæsaream sive Gastrotomiam*, opportunè, ritè, ac peritè institutam omni periculo vacasse, ex illa (quod notandum) parturientes sæpe minorem, quàm ex partu ordinario, dolorem sensisse, eandem optimè convaluisse, ac deinceps iterum iterumque prægnantes viâ solitâ feliciter peperisse; atque tum matris tum fœtus respectu, illam tali cautione propositam non adeò anceps quàm insons remedium esse.

V.

VERUM suprâ dictis omnibus seriò ac simul perperensis, præfertim admonitionibus severis, tum MAGNI RIOLANI, tum CLARISSIMI HEISTERI de non admoveendis ferramentis ad extrahendum fœtum nisi morte ejusdem certò cognitâ, & de aperiendâ post obitum gravidâ, ne fœtus intereat; perperensis etiam incertis ac peritissimos non rarò fallentibus, tum demortuæ gravidæ, tum fœtus extincti signis; metus adest, non vanus, sed verus, justus ac religiosus, fœtum obivisse credirum hamatili obstetricio sæpius interfici, gravidamque pro demortuâ habitam sectione Cæsareâ occidi; adeoque admonitiones illas quantumlibet severas in casibus hisce quandòque observari non posse, quandòque prudentiâ erroneâ ne quidem observandas existimari. Quinimò, perperensis ipsæ, manifestè pater gravissimos admonitores ipsos, RIOLANUM atque HEISTERUM, illis admonitionibus suis admonitiones alias omnino contrarias subungere, similibus licèt innixas argumentis, Gravidam nondum extinctam, ut fœtus fortè vivens servetur, homicidium judicant. Fœtum, ut servetur mater, interfici sine culpa homicidii posse, imò necessitate quâdam crudeli debere, pronuntiant. Dolendum sanè *Magnum Hommerum nostratem* ita dormitasse, TERTULLIANO vel hallucinanti ac devio, vel ab aliis perperam exposito inconsideratè solum. Aeterno silentio velandum esset RIOLANI nostri offendiculum, nisi celeberrimus HEISTERUS, eadem verisimilitudinis bonique specie forsitan allectus, in doctissimo ac locupletissimo, omniumque in

universum manibus versato Tractatu Chirurgico, illud manifestâset, suoque confirmâset suffragio. Neminem quippe excusare potest privata, quam ibi allegat ex Theologis Ecclesiæ Romanæ contrariis, interpretatio sententiarum: *Non occides; Non facienda mala ut eveniant bona; Quem non servasti dum potuisti, illum occidisti, &c.* His aliisque prolixè allatis, ac simili interpretatione privatâ expositis omnibus opponere sufficiet hocce: *Insontem & iustum non interficies, Exod. 23.* In tali enim casu fœtus omnino insons; insons omnino mater; fœtus insons respectu matris, mater insons respectu fœtus. Propterea neque fœtum insontem, ut servetur mater, neque matrem insontem, ut fœtus servetur, occidere ullâ unquam intentione directâ licere, Theologi nostrates optimè statuerunt. Huc confirmandæ sententiæ nostræ apponere liceat quod superius in Coroll. IV. locum habere debuerat, videlicet, Clariss. D. HEISERUM post admonitiones ibidem citatas, in Notis quibusdam subungere sequentia: » Hujus rei gratiâ Senatus Venetus (ut » MELLIIUS Lib. de Arte Obstetriciâ, cap. de Partu Cæsareo, ... refert) sancivit, » ne gravidæ mortuæ vel pro mortuis habitæ decussatâ Sectione incidantur, sed » simplici, ut aliâ in Sectione Cæsarea, ubi mater adhuc vivit: ut mater, si fortè » reviviscat, facilius conservari rursusque sanari queat, » Adhærentes itaque effato, quod nuperrimè protulit illustrissimus D. HELVETIUS noster, *ne dicas*, inquit, *Cæsareum Partum in certâ desperatione dubiam spem esse*, cujus effati probationem jam antehac exemplo singulari in Hist. Reg. Scient. Acad. an. 1731, allato innue- rat, concludimus.

Non ergo ad servandam præ fœtu matrem, Obstetricium hamatile minus anceps & æquè insons, quàm ad servandum cum matre satum Sectio Cæsarea.

DOMINI DOCTORES DISPUTATURI.

M. Tussanus-Gilbertus Boul-
land, *Consiliarius, Medicus*
Regis ordinarius in ejus Cæ-
stellero.

M. Gaspardus Cochon du
Pay, *in Arce maritimâ Ru-*
pifortensi Anatomæ & Chi-
urgiciæ Professor Regius.

M. Jacobus-Francisus Van-
dermonde.

M. Jacobus-Albertus Hazon.

M. Claudius-Carolus de Jean.

M. Francisus-Felicitas Cochus,
Scholarum Professor.

M. Claudius de la Vigne de
Frecheville, *Medicus Regis*
& Domûs Regiæ ordinarius.

M. Ioannes-Damianus Cheva-
lier, *Regis Consiliarius, Me-*
dicus ordinarius in Insulâ S.
Dominici.

M. Emmanuel-Mauritius Du-
verney.

Proponebat Parisiis, GUILLELMUS RUELLAN, Dinannæus, Doctor
Medicus Mompeliensis, Saluberrimæ Facultatis Medicinæ Parisiensis Bacca-
laureus, A. R. S. H. 1744, à sextâ ad meridiem.